



Cussegl da vischnaunca
50-2009/2012

Credit per la cumpra d'ina maschina per il menaschi tecnic

M E S S A D I

dalla suprastonza communal a al cussegl da vischnaunca

Preziada signura presidenta
Preziadas signuras cusseglieras
Preziai signurs cussegliers

Sco giu informau tier la tractaziun dil preventiv 2012, drova il menaschi tecnic ina maschina per saver dismetter la neiv dils passapeis. Adina puspei eis ei vegniu pretendiu aschibein dalla populaziun sco dil cussegl da vischnaunca, che la vischnaunca detti speciala atenziun als pedunzs e procuri per vias e sendas segiras; aschia era ella debatta dils 11 da november 2011, nua ch'in cusseglier ei s'exprimius sco suonda: "In eventual remplazzament da maschinas sto primarmein ir en favur d'in meglier manteniment dils passapeis, resp. dalla segirtad dils pedunzs.". La suprastonza

comunala ha fatg ina evaluaziun dil parc da maschinas communalas e dallas incaricas ch'il menaschi tecnic ha d'ademplier. Sin fundament da quella examinaziun ha ella fixau ils suandonts principis:

- La rumida da neiv duei vegnir surdada ad interpresas privatas aschi lunsch sco quei ei pusseivel. Cheutras sa la vischnaunca desister da custeivlas investiziuns per vehichels cun in pign diever.
- La vischnaunca duei seconcentrar sin la rumida dils passapeis e la tgira dallas sendas, quei ch'ei sia incarica prioritara. Cun il vegl vehichel actual eis ei buca pusseivel d'ademplier quella incarica. In remplazzament sto ademplier oravontut quels basegns.
- Per exequir las autras incaricas dil menaschi tecnic eis ei primarmein necessari da tschercar novs models da cooperaziun (affittaziun) cun interpresas privatas, quei oravontut per lavurs casualas, per las qualas igl acquist d'ina atgna macchina sepaga buc.
- Tier l'elecziun dil vehichel ein tuts interess dils differents menaschis da vischnaunca da risguardar (inclusiv CSC).
- Ina collaboraziun cun la vischnaunca da Tujetsch duei vegnir examinada. Las contractivas han mussau, che quei ei pusseivel per la senda Bugnei – Mumpé Tujetsch. Il medem vala era per la Claustra da Mustér e la Casa da tgira Sursassiala. La Claustra ei pronta da colaborar da cass tier cass, senza s'obligar da sorprendere definitivamein certas incaricas.
- A vesta dall'intenziun d'intensiver la collaboraziun cun las vischnauncas vischinontas sil sector dil forestallesser (p.ex. cuminonza da maschinas forestalas Cadi) eis ei era d'examinar, schebein ei dat novas pusseivladads da duvrar certas maschinas comunablamein.

Sin fundament dallas retschercas eis ei semussau che la vischnaunca sto seconcentrar sin la dismessa dalla neiv dils passapeis e la tgira dallas sendas e dar speciala atenziun als pedunzs. Cun la macchina actuala eis ei buca pusseivel d'exequir quellavurs. Consequentamein san certas parts dalla reit da passapeis e sendas buca vegnir aviartas enteifer il temps necessari, quei che caschuna malaveglia aschibein tier vischins sco tier ils hosps. Perquei eis ei previu da cumprar ina macchina speciala per la dismessa dalla neiv dils passapeis. En damonda vegn in vehichel secumprovau ed experimentau (Holder), ch'era las vischnauncas vischinontas possedan. Quei levgescha la cooperaziun. Sper la dismessa dalla neiv, eis ei era pusseivel da segar pastgets. Perquei drova ei ina completaziun entras indrezs accessoris sco in cundrez da segar e bugnar, in taglianeiv, in cundrez da better sablun sin sendas e passapeis.

Cun quella cumpra eis ei pusseivel d'ademplier en fuorma optimala la dimessa dalla neiv dils passapeis ed ina buna part dallas sendas aviartas igl unviern sco era da corrispunder als giavischs dalla populaziun. Cun ils indrezs supplementars san ulteriuras lavurs dil menaschi tecnic vegnir exequidas. Sin fundament dallas experiencias duront igl unviern 2012/13 e la stad 2013 eis ei lu pusseivel da giudicar, schebein ei drov aunc in'otra macchina per il survetsch tecnic. Quei savess succeder en collaboraziun cun las vischnauncas vischinontas.

Il preventiv 2012 cuntegn ina summa da frs. 200'000.-- per la cumpra d'ina macchina per il survetsch tecnic. La proposta suramenziunada cuosta mo frs. 175'000.--, aschia ch'ei seresulta in respargn da frs. 25'000.-- visavi il preventiv.

Proposta

Sebasond sin sura consideraziuns

propo na

la suprastonza communalala al cussegl da vischnaunca da:

- conceder in credit da frs. 175'000.-- per la cumpra d'ina maschina per rumir la neiv dils passapeis.

Suprastonza communalala Disentis/Mustér

Il President:

Il canzlist:


Dr. Dumeni Columberg


Andri Hendry

Disentis/Mustér, ils 30 d'october 2012